

ETA bost edo zazpi urtetan amai daitekeela dio Mayorrek

«Usteltze prozesuagatik» ez duela hogei urte iraungo esan du

Jaime Mayor Orejak ETA usteltze prozesuan dela uste du, eta ondorioz, bost edo zazpi urteren buruan amai daitekeela. Halaber, beste hogei urte ez duela iraungo iragarri du. Bestalde, 'Y taldeak' desegiteagatik pozik azaldu zen.



Jaime Mayor Oreja Espainiako Barne ministroa, kazetarien aurrean eginiko agerpen batean.

DAVID AGUILAR / EFE

Agentziak / Madril

ESPAINIAKO Barne ministroa kazetariekin mintzatu zen atzo. Hizketaldian esan zuenez, ETA usteltze prozesuan dago eta bost edo zazpi urtetan amai daiteke; gainera, ez duela inondik inora beste hogei urte iraungo esan zuen.

Espainiako Barne ministroak esan zuenez, une hori iristen deanean errazagoa izango da akordioa ETako buruekin lortzea HBkoekin baino. «Bakea lortzen ez bada ETako buruak dira galtzeko zerbait dutenak; Floren Aoz eta Rufino Etxeberria bezalako HBko buruek, berriz, ez dute ezer galtzekorik», esan zuen.

Bestalde, ETak bahituta dituen bi lagunen kasua ere aipatu du. Mayor Orejak Gabon-gauean

bahituen senideekin hitz egin zuela azaldu zuen, eta bi familien jarreraren artean alde nabaria dagoela esan zuen. Espetxe funtzionarioaren senideak nahiko erasokor sumatu zituen Barne ministroak, eta espetxe politikarekin kritiko azaldu zirela gaineratu zuen. Mayor Orejarentzat funtzionarioaren askapena neurri handi batean Gobernuak daraman espetxe politika aldatzearen ondorio izan daitekeela kontuan hartuz, normala da Ortega sendiaren jokaera. Hala ere, ez duela bere jarrera aldatuko argi utzi nahi izan du. Aldiz, Cosme Delclauxen sendiaren jarrera oso bestelakoa dela esan zuen. Bere ustez, Delclaux sendiak badaki zer egin behar duen, ETaren helburua diru lortzea baita.

'Y taldeen' desegiteagatik pozik • Barne ministroak urteko balantzea ere egin zuen eta Y taldeei buruz aritu zen batez ere. Polizia Nazionala zoriondu zuen arlo honetan eginiko lanagatik, eta horrek «poliziak erantzuteko duen gaitasuna» agerian uzten duela esan zuen. Mayor Orejak ustezko sei Y talderen desegitea aipatu zuen hori azaltzeko, baina, aipatu zituen polizi operazio horietan atxilotutako lagun gehienak egun kalean dira. 24 pertsonaren atxiloteta aipatu zuen Barne ministroak, eta hauetatik 14 egun kalean dira, gehienak kargurik gabe. Gainera, beste guztiak behin-behineko egoeran daude espetxean. Mayor Orejak esan zuenez, «Y taldeak» ETaren usteltzearen seinale dira». X

Nafarroan atxilotuak Madrilen daude

■ Irungo epaileak espetxeratu egin du Hondarribian atxilotutako gaztea

Erredakzioa / Iruñea-Donostia

JOAN den ostiralean eta larunbatean Iruñerrian atxilotu zituzten bost gazteak Madrilera eramane zituzten igandean. Atzo arratsaldean Poliziaren esku segitzen zuten, Entzutegi Nazionalen deklaratzeko zain. Litekeena da gaur goizean eramatea epailearengana.

Atxilotuak, Iruñekoak eta Atarrabiakoak, honako hauek dira: E.B.M. eta C.I.B, biak 18 urtekoak, C.F.M. eta M.G.E., 17 urtekoak, eta I.B.M., 16 urtekoa. Poliziak ETari lagundu ohi dioten Y taldeetako kide izatea leporatu die, eta sabotaje ugari egotzi dizkie. Nafarroako Gobernu Ordezkaritzaren arabera, atxilotuak

parte hartu zuten Uharteko, Txantreako eta San Femin Txiki jailetako istiluetan —azken hauek molotov koktelez zauritu zuten poliziak erredura larriak izan zituen—. Horrez gainera, Iruñeko eta Donostiako zenbait autobus, auto eta kutzazain automatikori su eman izana leporatu die Poliziak.

Aurreko astean beste Y talde bat desegin zuela esan zuen Poliziak. Orduan ere bost gazte atxilotu zituzten Iruñean eta, Entzutegi Nazionaletik pasatu ondoren, denak espetxeratu zituzten epailearen aginduz. Atxilotutako hiru adin txikikoak ziren. Atxiloteta haiei esker egin direla oraingoak esan zuen Mayor Oreja Barne ministroak.

Bestalde, kale istiluekin zerikusia izateaz salatuta Ertzaintzak urtarilaren 3an Hondarribian atxilotu zuen 17 urteko gaztea espetxeratzeko agindua eman du Irungo epaileak. Eusko Jaurlaritzako Barne Sailak emandako bertsioaren arabera, Bidasoa aldean izandako sabotajeen ugaritzea aztertzeko Ertzaintzak eginiko ikerketen bidez Hondarribian kale istiluetan erabiltzen diren materialak prestatzeko garaje batzuk bazirela jakin zen. Zenbait ertzainek gazte bat garaje batetik bestera boltsak eramaten ikusi zuten. Ondoren, ertzainak azken garaje honetara sartu zirenean adin txikiko gaztea molotov koktelak prestatzen harrapatu zuten. X

Polizia baten autoan zegoen lehergailua indargabetu dute

■ Norbaitek deitu zuen bonbaren berri emateko

Erredakzioa / Bilbo

POLIZIA NAZIONAL baten autoaren azpian jarritako lehergailua indargabetu zuen herenegun Ertzaintzak Bilbon. Lehergailu honen indargabetzea DYA erakundeari norbaitek bonbaren berri emanez eginiko deiaren ondorio izan zen. Antza, lehergailuak egun batzuk zeramatzan auto azpian eta ez zuen orain artean eztandarik egin.

Herenegun gauean, 21:00ak aldera, norbaitek DYAr deitu eta Bilboko Uribarri auzoan zegoen guardia zibil baten autoan lehergailu bat zegoela esan zuen. Gainera, bomba hori urtarilaren 2tik jarrita zegoela azaldu zuen. Deia jaso zuen DYAk kideak poliziari hots egin zion ezezagunak esandakoaren berri emateko.

Ondoren, La Salveko kuarteleko Guardia Zibilak bertara joan ziren deia egiazkoa ote zen ikusteko. Lehen ikusketen ostean Guardia Zibilak baztertu egin zuen bere kideren baten autoan lehergailuren bat egon

zitekeela. Baina, ikerketa lanean ari ziren ertzainak ingurunea aztertzen jarraitu zuten eta polizia nazional baten Ford Orion autoan lehergailu bat topatu zuten. Ertzaintzako talde berezia lehergailua indargabetzeko lanean aritu zen, eta 23:15etarako egin zuten. Ondoren, autoa handik eraman egin zuten.

Huts egindako atentatuaren egilea Bizkaia komando berria izan daitekeela susmatzen du Poliziak. Ertzaintzak 1994ko azaroan desegin zuen ustezko Bizkaia komandoa. Ertzaintzak, ordea, atxiloteta hauek egin zituenean taldeko zenbait kidek ihes egitea lortu zutelako susmoa zuen eta ihes egindako kide hauek komandoa berriro osatzea lortu dutela uste du. Polizi iturrien arabera, Bizkaia komandoa beste lau aldiz berregituratu da, eta honen arduradunak aurreko desegituraketa gertatutakoan ihes egitea lortu zuten kideak izan dira. Guztietan ihes egindako kideek antolatuta omen dute komandoa berriro. X

Gonzalez prest dago GAlen epaiketan deklaratzeko

■ Barrionuevoren eta Veraren errugabetasuna defenditzeko asmoz

Erredakzioa / Donostia

FELIPE GONZALEZ, Espainiako Gobernuako presidente ohia, prest dago GAlen auziaren epaiketan lekuko gisa agertzeko Auzitegi Gorenean. Horren helburua Jose Barrionuevo Barne ministro ohiaren eta Rafael Vera Segurtasunerako Estatu idazkari ohiaren errugabetasuna defenditzea litzateke, El Diario Vasco eta El Correo Español egunkariak atzo ziotenez.

PSOEn goraian ETAre kontra eginiko guda zikinaren lehen ekintzak ikertzen ari da Eduardo Moner Auzitegi Goreneko epailea Segundo Mareyren bahiketari buruzko sumarioan. Horren barruan ez da onartu Gonzalezek auzipetu gisa deklaratzeko. Hori dela eta, uda aurretik egingo den epai-

ketan baliteke Gonzalezek lekuko gisa deklaratzeko eskaera izatea. Kasu horretan ere, Gonzalezek ez luke pertsonalki agertu behar, idatziz igorri ahal izango zukeelako deklarazioa.

Dena den, eta atzo zabaldu zen informazioaren arabera, Gonzalezek Auzitegi Gorenean agertzeko asmoa du. PSOEko iturrien arabera, ez dago horregatik kezkatuta, ezta bere presentziak eragin dezakeen irakurketa politikoagatik ere.

Gonzalez ezezik, beste buruzagi ezagun batzuk ere erabili nahi dituzte Barrionuevoren eta Veraren abokatuek. Charles Pásqua Frantziako Barne ministro ohia eta Rodolfo Martín Villa transizio garaiko borroka antiterroristako burua defentsako lekuko gisa erabiltzeko aukera ikusten ari dira. X

CELULOSAS DE ANDOAIN, S.A.

AKZIODUNEN EZOHiko BATZAR NAGUSIA

Administrazio Kontseiluak, legezko eta estatutuak aginduei jarraiki, Akziodunen Ezohiko Batzar Nagusirako deia egin du. 1997ko urtarilaren 30eko 19:00etan egingo da lehen deialdian, sozietatearen egoitzan, edo beharrezkoa izanez gero, hurrengo egunean, urtarilak 31, bigarren deialdian, leku eta ordu berean; beti ere helburua ondoren aipatzen diren gaiak aztertzea eta horien gaineko erabakiak hartzea izango da:

GAI-ZERRENDIA

Lehenengoa.- Administrazio Kontseiluaren Erabakiak berrestea.

Bigarrena.- Auditoreak izendatzea.

Hirugarrena.- Batzordeak hartutako erabakiak betetzeko baimena, eta horiek dokumentu publikotzat jotzea.

Laugarrena.- Batzordearen Akta onartzea.

Andoainen, mila bederatziehun eta lau rogeita hamaseiko abenduaren hogeita zortzian. Administrazio Kontseiluko lehendakaria.